

Ti xroon saoxín chr'éhen Pablo ti sin

Tesalonicenses

Pablo nixjehę ti sin Tesalónica

1 ¹*Janhan Pablo, Silvano la ko Timoteo, mé ikjian ti xroon i chr'ahánra jahara kíchóni nínko Tesalónica kixin nkokqa tinkáchónkini It'eni Díos la ko Ìnchéni Jesucristo. Kjuasáye It'eni Díos la ko Ìnchéni Jesucristo chrókjuintañaora kixin kjuaxróxin chrók'uejora.

**Ti nkehe jína kjuakoxin
Tesalónica**

²Nkochrínxín chjéheni Díos kjuasáya kixin ti jahara la ko xraxinkaoni ti jahara.

³Ti ó nixjeheni It'eni Díos la xraxinkaoni kixin kaín asánra kuitekáonra Ìnchéni, la ko imá jína kjujch'ehera ch'an ixra kixin chaxín tjuéhéra ch'an, la ko nkokqa tjejochóhénra kixin tsokjan Ìnchéni Jesucristo.

⁴Kíchóni, Díos imá tjuahára la ó noheni kixin jehe ch'an mé tsíkjéyára ch'an. ⁵La xikaha ti ó kjuújini chjasánra, kjuákohára ti itan jína tsaáxini, la jehya iténi ó

chrónkaxíni. Náhí. Kjuachaxíen Nchakuén Díos kjuakoxini la ó noheni kixin ti itan kjuakoni la chaxín ndoá. Jahara la ó nohara nkexrín kjuák'eni ti t'ejora, mé xikaha kjuakoxini kixin jína chrók'uejora.

⁶*Méxra jahara ó kuitekáonra éxi kjuakoxini la ko éxi kjuakoxin Ìnchéni Jesucristo. Mé kócháhara kuitekáonra ti itén Díos kixin ti Nchakuén Díos mé tjáhara kjuachéhe, kjónté nchónhña nkehe náxrjónhña k'uat sínkara. ⁷Mé xikaha jahara jína kjuákohéra kaín ti sin tinkáchónki Ìnchéni kaín ti chjasin tjejó Macedonia la ko Acaya nkexrín chrók'uejó ti chojni tinkáchónki Díos.

⁸La jahara kjuákora ti itén Díos, la jehya jehó ti chjasin tjejó Macedonia la ko Acaya. Kjaxin kaín chjasin chjinaxón ntiha kuíhin sin kixin nkexrín tinkachónkíra Díos. Andá jeheni la í ticháxinhña fjnko nkehe naxa chróchronkani. ⁹Ijie la jehe sin mé tjejóchronka sin

1:1: Hch. 17:1. 1:6: Hch. 17:5-9.



Ti k'uaji ch'in Pablo
(1Ts. 1:9)

kixin nkexrín kjuíjini chjasánra, la kaínra kjuájónra kjuachaxin k'uéjoni la ko kuitekáonra ti itén Díos kjuákohára, la kuítóhéra kaín ti nkehe tsíkjanõña, kixin kuitekáonra ti Díos tjechón chaxín. ¹⁰La ko kjaxin chrónka sin kixin nkexrín tjejóchohénra kixin tsòkjanxìn nkaya nkajíní ti Xjeen Díos, Jesús. Díos mé kjuínchexechón ti jehe ch'an la jehe ch'an mé sinchekaá ch'an ti jeheni kixin chrókjuasótexínhñani ti kjuanínkaon kuénté Díos itsi.

Ti ixra tsíkjich'e Pablo
ti chjasin Tesalónica

2 ¹Méxra jahara kíchóni, ó nohara kixin jehya ó chónkó ti kjuíjini chjasánra. ²*Kjaxin ó nohara kixin senó la ti sin chjasin Filipos

k'uékjinchekjasóte sin ti jeheni la ko kuék'ántaxín sin. Kjánchó Díos mé kjuínkítsa ti jeheni, ndá chrákonhani kjuákohehni ti jahara ti itén Díos tsaáxini, kjónté imá nínkaon ti sin a. ³Méxra jehya nduáhya kjuakoni, la ko jehya nijnko nkehe nduáhya nixjani la ko kjuích'iyehyani ninkexró. ⁴Náhí. Díos mé chéhe kixin jina k'uéjoni la kjuajon ch'an ti ixra tsjakoni ti itan tsaáxini, mé xíkaha ndoá tjakoni. Jehya kixin tjinkaoni chrókóchéhe chojni ó. Náhí. Tjinkaoni tsochéhe Díos, ti nkexro nohe kaín nkehe tjenkayáxin aséni. ⁵Ó nohara kixin kjuích'iyaxínhñani ti itan imá náxrjón chrónixjani, kixin xíkaha chrókjuachaxini chichaon. Díos mé tjetsjehe kixin jehya xíkaha tjenkayáxini. ⁶La ko kjaxin tjejáhyani kixin

chojni chrókjuikosáyehe ti jeheni, á jahara la o íso chojni. ⁷Náhí, xíkahnã tjenkáyaxini, kjónté chóntani kjuachaxin chrók'uetoani kixin jahara chrókjuínkítara ti jeheni, kixin Cristo kjueyá ti jeheni kixin sich'ehe ni ch'an ixra. La nkojína nixjani la k'uéjoni éxi ijnko ñé xjan t'ayakohen xjeen kixin jína ts'ánkí xjan. ⁸Mé xíkaha imá tjuáhára, ndá jehya jehó ti itén Díos kjuakoni. Náhí. Kjónté chrók'uenxíni ti tjakoni kixin xíkaha imá tjuáhára. ⁹Kíchóni, xráxinkaonra kixin ti ó kjuakoni itén Díos la kjaxin kjuích'eni ixra nchakotjin la ko tie kixin kjuachani chichaon k'uexaxíni nkehe kjonieni, kixin tjinkakohnãni chrókjuajoni ixra.

¹⁰Jahara la ó nohara la kjaxin Díos ó nohe kixin chaxín ndoá kjuakoxíni ti k'uejókoni ti jahara. Ninkexró chrók'uekahya ijie ti jeheni kixin ichrén nkehe nduáhya kjuích'eni, kixin tinkachónkira Ìnchéni. ¹¹Kjaxin jahara la ó nohara nkexrín jína níxjahára kixin jína chrók'uejora, nixjani éxi ijnko it'é ixjan nixjehe ti xjeen. ¹²La ko kjuakoni kixin jína chrók'uejora éxi tjinkaon Díos chrók'uejó kaín ti sin tinkáchónki ch'an, kixin jehe ch'an ó k'uéyahára kixin chrók'uayéhéra ti kjuachaxin kuènté ch'an la ko chrók'uejokqara ch'an.

¹³Méxra, nkochríxín chjéheni Díos kjuasáya kixin ti ó kuihínra ti itan jína kuènté Díos kjuakoni, la kjuátsoanra kixin tíha la itén Díos, jehya itén chojni ó. Tíhi la chaxín itén Díos, la tíhi tjech'e ixra nkaya asánra kixin titekáonra. ¹⁴*Mé xíkaha jahara kíchóni, kjuasótiara kixin ti sin chjasánra kónínkaon sin éxi yóhe kjuasóte ti sin kuènté Díos tinkáchónki Ìnchéni Cristo Jesús ti nonte Judea, ti ó kjuankíxín kuinkáchónki sin Ìnchéni, ndá ti sin judío chjasén sin kónínkakohen ti jehe sin la ko tjinkaon sin chrók'óñá sin. ¹⁵*Ti sin a tsík'óñá sin Ìnchéni Jesús la ko kjaxin tsík'óñá sin ti sin k'uéchronka itén Díos ósé, la xíkaha kjaxin k'uínkítéxín sin ti jeheni. Mé xíkaha kónínkakohen sin kaín chojni, la Díos kóxríenñã ti nkehe kjuích'e sin. ¹⁶Andá ti ó tjinkaoni kixin chrókjuakoheni ti sin jehya judío ti itan jína chrókuaáxín sin, la jehe sin tjinkakohnã sin kixin tsjakoni. La xíkaha imá nchek'ánkí sin ti ijie kuènté sin. Andá ijie ó ikui ti kjuanínkaon kuènté Díos tsjasótéxín sin.

**Pablo tjinkaon sátsjitsjehe
ti sin Tesalónica**

¹⁷Kíchóni, kjónté kuítóheni ti jahara la ókjé k'uéjoni, la imá xraxinkakaoni ti jahara la ko kjaxin imá tjinkaoni

chrókjuíjtsjeheni ti jahara ínaá. ¹⁸La xíkaha janhan Pablo itsjé vece t́jínka_oan chrókjuasánts_oahá ti jahara, andá ti Jínahña mé kjuixrónkáxin ndá xitjahya kjuasán. ¹⁹¿Nkehe tsohen ti ixra tjejóch'eni la nkehe tjejóchuénxini la ko nkekuènté tjejóchéheni? Jahara mé tsochèxini ti ó itsi Ìnchéni Jesucristo kixin kuitekáonra ch'an. ²⁰Méxra ímá chéheni kixin jahara kuitekáonra Ìnchéni Jesús.

3 ^{1*}Ímá kóxakoheni kixin ti jahara. Ndá kjuénkayáxini kixin chájína chrókuítoheni chjasin Atenas ó ²la tsochr'áni kíchóni Timoteo tsjijtsjehe ti jahara kixin kjaxin tjech'e ch'an ixra kuènté Díos, tjejókoni ch'an tjako ch'an ti itan kuènté Cristo tsaáxini. Ndá ichr'áni ch'an kixin sintaxrinxkaonra ch'an ti itén Ìnchéni la ko jína tsonixjahára ch'an kixin tsochéhe asánra ³kixin nijnkora chrókóxakohanra kixin ti náxrjónhña tjejó t'atsínkara. Méxra ó nohara kixin ticháxin tsjasótexíni ti ixra kuènté Ìnchéni. ⁴Naxa k'uéjoni nkokoa la ó tjonkara kixin kaíni kjuaxróxinhña ts'ejóni tsjasóteni. Andá ijie la ó nohara kixin chaxín xíkaha kóhen. ⁵Méxra ímá kóxakóna janhan, ndá ichr'án kíchóni Timoteo kjuíjtsjehe nkexrín tjejora, á naxa tinkachónkira Ìnchéni o

á ti Jínahña kjuacha kjuachrèe ti jahara kixin tsitohéra ntje Ìnchéni. Kixin ti xíkaha chrókóhen la chónkó kaín ti ixra kjuíuch'eni kjuakoni.

^{6*}Andá ijie ó kjanxin ch'in Timoteo chjasánra Tesalónica la chrónka ch'an kixin jína t'ejora, naxa tinkachónkira Ìnchéni, la naxa tjehéra kichuara la ko chrónka ch'an kixin xráxinkaonra ti jeheni la ko tjínkaonra ts'ikonra ti jeheni. Kjaxini xíkaha tjenkayáxini, tjinkaoni chrókjuíjtsjeheni ti jahara. ⁷Mé xíkaha kíchóni, kjónté kjuaxróxinhña tjejóni ntihi, la chéhe aséni kuíhini kixin kaín asánra naxa tinkachónkira Ìnchéni. ⁸Méxra ti kuíhini xíkaha, ndá antsí kóchéheni kixin jína tjejora, naxa tinkachónkira Ìnchéni Jesús, ⁹ímá chjéheni Díos kjuasáya kixin ímá chéhe aséni kixin tinkachónkira ch'an. ¹⁰Méxra tie la ko nchakotjin chrónoéheni Díos kixin tsjajon ch'an kjuachaxin tsjijtsjeheni ti jahara ínaá, kixin naxa t'itjáña iso nkehe chrókjuakoni kixin antsí chrókuinkachónkira Ìnchéni.

¹¹Tjancheheni It'éni Díos la ko Ìnchéni Jesucristo kixin chrókjuinkítsani chrókjuíjtsjeheni ti jahara, ¹²la ko tjancheheni Ìnchéni kixin chrókjuinkítsa ti jahara kixin

antsí chrók'uánkí ti tjuéhéra kichuara la ko ti tjuéhéra kaín chojni éxi tjuexíni ti jahara. ¹³Tjancheheni Díos kixin jína chrók'uejora, kaín asánra chrókuitekáonra ch'an kixin tsochontahyara ninkehó ijie nkayakon It'éni Díos ti ó tsokjan Ìnchéni Jesús tsíkəo kaín ti sin ó tsíkótjóa.

Chrok'uejóni éxi tjinkaon Díos

4 ¹Jahara kíchóni, xrjanoáhára la ko ntəxráxinkaonra, kjuachaxien ihnié Ìnchéni Jesús kixin antsí jína chrók'uejora, chrókuinkachónkira Ìnchéni. Mé xíkaha kjuakoni ts'ejora éxi tóxríhín Díos la xíkaha jína tjejora ijie.

²Ó nohara ti nkehe kjuakoni ti kjuachaxien Ìnchéni Jesús. ³Ti nkehe tjinkaon Díos la tjóa la ko jína chrók'uejora, la chrókjuásinkoáhyara ijie fjnko chojnichjin. ⁴Méxra chrókónohara chróchontara nkojnko ichjiánra la ko jína chrók'uejora, chrótjuéhéra kichuara ⁵kixin chróndáchrohya asánra ti nkehe jínahña chrókjuich'era éxi tjenkayáxin ti chojni tinkáchónkihya Díos. ⁶Méxra nijnkora chrókjuich'iyehyara kichuara xíkaha éxi ó xrjanká senó kixin Ìnchéni mé sinchekjasóte ti chojni xíkaha tjenkayáxin. ⁷Kixin Díos la kjueyáhya ti jeheni kixin naxa chrókjuasini

ijie. Náhí. Tjinkaon ch'an kixin tjóa chrók'uejóni. ⁸Andá ti sin titekakonhña ti nkehe tjakoni, la jehya kixin chojni titekakuenhña sin. Náhí. Titekakuenhña sin Díos, ti nkexro kjuajon ti Nchakuén chóntani.

⁹Andá ti tjuéhé kichuara, la í ticháxinhña naxa chrókjini xroon chróchronkani kixin nkexrín chrótjuéhéra kichuara. Náhí. Díos mé kjuakohara nkexrín chrótjuéhéra kichuara. ¹⁰Xráxín xíkaha tjuéhéra kaín ti sin kíchóni tjejó Macedonia. Kjánchó xrjanoáhára kíchóni kixin antsí chrótjuéhéra kichuara.

¹¹Méxra chrókóxakohanra kixin kjuaxróxin chrók'uejora la nkojnkorah nohara nkehe ti ixra chrókjuich'exínra itjárah éxi kuétuahanra.

¹²La xíkaha chrók'uiikon ti sin tinkáchónkihya Díos, ndá chrókjuikosáyahara sin la ko kjaxin chrók'uitjáñahña ninkehó ti nkehe chrókuichánxihanra.

Ti ñəo itsi Ìnchéni

¹³Kíchóni, tjinkakonhñani kixin chrókónoahñara nkehe tsohen ti sin tsík'en. Kixin kanhño chrók'uavára, chrók'ónahñara éxi ti sin tinkáchónkihya Ìnchéni, tjenkayáxinhña sin kixin tsoxechón chojni inaá. ¹⁴Kixin ti titekaoni kixin Ìnchéni Jesús la ik'uén la ko xechón inaá, la kjaxin titekaoni kixin éxi

Díos kjuínchexechón Jesús la ko ti ó tsokjan Jesús la xíkaha sinchexechón Díos kaín ti sin tsík'en, ti sin kuitekaon ti jehe ch'an.

¹⁵*Méxra chenkaní ti jahara ti nkehe kjuako Ìnchéni kixin ti naxa tjejóchóni ti ó itsi ch'an, la naxa sátsjijhyani ti itjen ch'an, tsoxechónjña sao ti sin tsík'en.

¹⁶Kixin Ìnchéni mé ts'inkajixín nkajní la itsen tsonixja ch'an kixin ti kjuachaxin ijié chóna ch'an la ts'èya ti ángel t'etōan la ko tsondáchro ti trompeta kuènté Díos. Andá kaín ti sin tsík'en kuitekaon Ìnchéni Jesús la tsoxechón sin sao sin. ¹⁷Andá chr'éxín la kaíni tjejóchóni la ko kaín ti sin tsíxechón mé nkokōa sátsjini chríkjan itji la ntiha tsoxétani Ìnchéni ndá xíkaha ts'ejókoni ch'an nkochríxín. ¹⁸Mé xíkaha chróchenkara kichuara ti itan i kixin tsochéhe sin.

5 ¹Kjánchó ti ñao tsohen tíhi, kíchóni, la í ticháxinhña naxa chrókjini ijnko nkehe.

²*Jahara ó nohara jína kixin titàyé itsi ti ñao tsokjan Ìnchéni, éxi chrókui ijnko xíchee ti ó sítie, chrókuik'ixehen ijnko nchia. ³Ti ó tsondáchro chojni: "Ijie kjuaxróxin tjejóni la ko ninkehó nkehe náxrjónhña sítóhen", ndá titàyé itsié ti kjuaxikaon ijié la ko kjuachrakon ijié. Éxi ijnko tjachjin jóhya tjan

titàya itsié ti ñao itsi ti kjuatjoté kixin sinchekokjíhi tjan xjeen tjan, la xitjahya tsondáchro tjan "Náhí", mé xíkaha tsohen ti chojni titekakonhña, la tsochóntahya sin nketí tsaáxin sin. ⁴Andá jahara kíchóni,

jehya sítie chrók'uejora kixin chróchrakonra ti ó itsi Ìnchéni éxi chrókui ijnko xíchee chrókjuíntachrakonra.

⁵Kaínra tjejora ti t'inkaséña.

Méxra jeheni la jehya tjejóhyani ti sítie. ⁶Méxra, chrók'uejójuahyani éxi tjejójua ti íso sin, chrók'uejósjeheeni, la chrókjuénkayáxini jína. ⁷Kixin ti sin tjejójua, la tjejójua sin ti sítie, la ko ti sin tókoan, la sítie tókoan sin. ⁸*Andá jeheni la t'ejóni ti t'inkaséña, méxra ticháxin jína chrókjuénkayáxini, la jína chrók'uejóni chrókuinkáchónkini Ìnchéni la ko chrótjeheeni ch'an. Ìnchéni mé ts'ayakohen ti jeheni kixin tsaáni, éxi ijnko soldado tsík'inkáya ika tsík'ónaxín chika kixin kohya nkehe tsohen ti ntakuin. Mé chrók'uejóchóheni itsi Ìnchéni kixin tsaáxini, éxi ti soldado xrasin kásko t'ayakohen ikja. ⁹Díos k'uéyehya ti jeheni kixin chrókjuinчекjasóte ch'an ti jeheni. Náhí. Kjueyá ch'an ti jeheni kixin chrókuaáxini Ìnchéni Jesucristo. ¹⁰Jesucristo mé k'uenyákohen ti jeheni kixin chrók'uejókoni ch'an

nkochrín, á tjejóchóni o tsík'eni. ¹¹Méxra chrókócháhara, la ko chrókjuínkĩtsara kichuara kixin jína chrók'uejora éxi xráxín nchexiteyára.

Pablo nchexraxinkaon ti sin tinkáchónki Cristo

¹²Kíchóni, xrjanoáhára kixin chróchontehéra kjuasàya ti sin tjejóch'e ixra kuèté Díos ntiha, tjejótaón sin ntia, chronka sin itén Ìnchéni. ¹³Chrochontehéra sin kjuasàya la ko chrótjuehéra sin kixin ti ixra tjejóch'e sin. Andá jahara kaínra nkojína chrók'uejokõara kichuara.

¹⁴Méxra tétuahanra kíchóni, kixin chrókjuénduehéra ti sin tjinkakohnã sich'e ixra, la ko kjaxin jína chrónixjehéra ti sin k'óxrjé asén kixin tsochéhe sin, la ko chrókjuínkĩtsara ti sin naxa noehã, la ko chrókónínkakuénhãara ninkexró.

¹⁵Ninkehó nkehe nduáhya chrókjuich'ehyara ti sin nduáhya kjuít'ahara. Ícha jína chrókjuákoxinra nkehe jína kixin ts'ikon kaín chojni kixin jína t'ejora.

¹⁶Méxra chrókóchéhe asánra nkochrín. ¹⁷Chrokuitõéhyara chrónixjehéra Díos nkochrín. ¹⁸Kjóté ichrén nkehe chrókóhanra, la chróhchjehéra Díos kjuasàya kixin xikaha tjinkaon ch'an chrókjuákoxinra

kixin tinkachónkira Ìnchéni Cristo Jesús.

¹⁹Tók'ánkáhyara ti xrohi kuèté Nchakuén Díos.

²⁰Chrochontehéra kjuasàya ti nkehe tjako ti sin kíchóni, chrónkaxín sin ti kjuachaxin kuèté Díos. ²¹Chrotsjehéra jína ti nkehe tjejóch'e sin. Andá ti jína tjakoxin sin la chrókuitekáonra.

²²Chrokuitõhéra kaín nkehe jínahã.

²³Díos mé tjajon kaín kjuaxróxin la ko jehe ch'an mé chrókjuinchetjóára ch'an la ko chrók'uayakohen ch'an ti nchakuánra la ko ti asánra la ko ti cuerpo kuètára kixin tsochóntahya ninkehó ijie ti ó itsi Ìnchéni Jesucristo. ²⁴Díos, ti nkexro kjueyá ti jahara, mé jína, la ko kaín ti nkehe ndáchro ch'an la tsoxiteyá.

Kjuixixín níjja Pablo

²⁵Kíchóni, nixjehéra Díos kixin tsjinkĩtsa ch'an kaíni ²⁶la ko nkojína nixjehéra kaín ti sin kíchóni t'ejokõara.

²⁷T'etõaxíni ti kjuachaxin kuèté Ìnchéni kixin nchekuáxinra ti xroon chr'ahánra kixin tsihin kaín ti sin kíchóni tjejó ntiha.

²⁸Ìnchéni Jesucristo, ti nkexro tjehe ti jeheni, mé sintañaora kaínra. Mé xikaha tsohen. Ó tjen.